

欽  
定  
全  
唐  
文

欽定全唐文卷一百二十七目錄

後唐太祖曹皇后

遺令

後唐明宗曹皇后

以皇長子潞王監國令

以潞王從珂即皇帝位令

晉高祖李皇后

降契丹表

漢高祖李皇后

議擇嗣君詔

冊徐州節度使贇即帝位詔

臨朝詔

命宰臣權軍國事詔

降封徐州節度使贇爲湘陰公詔

答周太祖詔

後唐魏王繼岌

喻蜀郡檄

欽定全唐文卷一百二十七

後唐太祖曹皇后

貞簡皇后曹氏莊宗母太原人以良家子嬪於太祖爲次妃封晉國夫人莊宗即位尊爲皇太后崩諡貞簡

遺令

皇帝以萬機至重八表所尊勿衣粗衰勿居諒闇三年之制以日易月過三日便親朝政皇后諸妃及諸王公主並制齊衰本服以日易月十三日除中書門下翰林院學士在朝文武百官內諸司使及諸道節度觀察防禦使刺史

監軍及前資官並寮佐官吏士庶僧道百姓並準本朝故事降服施行勿使過制皇帝釋服後未御八音勿廢羣祀勿斷屠宰勿禁宴遊園陵喪制皆從簡省故申遺令奉而行之

後唐明宗曹皇后

明宗后曹氏初封楚國夫人天成三年正月冊爲淑妃長興元年正月冊爲皇后應順元年正月冊爲皇太后晉天福五年追冊曰和武顯皇后

以皇長子潞王監國令

先皇帝誕膺天睭光紹帝圖明誠動於三靈德澤被於四海方期偃革遠嘆遺弓自少主之承祧爲奸臣之擅命離間骨肉猜忌盤維旣輒易於藩垣復驟興於兵甲遂至輕離社稷大撓軍民萬世鴻基將墜於地皇長子潞王從珂位居冢嗣德茂冲年乃武乃文惟忠惟孝前朝廓清多難有戰伐之大功績紹丕圖有夾輔之盛業今以宗祧乏嗣園寢有期須委親賢俾居監撫免萬幾之壅滯慰兆庶之推崇可起今日四日知軍國事權以書詔印施行

以潞王從珂即皇帝位令

先皇帝櫛風沐雨平定華夷嗣洪業於艱難致蒼生於富庶鄂王嗣位奸臣弄權作福作威不誠不信離間骨肉猜忌盤維鄂王輕舍宗祧不克負荷洪基大寶危若綴旒須立長君以紹丕構皇長子潞王從珂日躋孝敬天縱聰明有神武之英姿有寬仁之偉略先朝經綸草昧廓靜寰區辛勤有百戰之勞忠貞贊一統之運臣誠子道冠古超今而又克已化民推心撫士率土之謳歌有屬上蒼之睇命攸臨一日萬幾不可以暫曠九州四海不可以無歸況因山有期同軌斯至永言嗣守屬任元良宜即皇帝位

晉高祖李皇后

高祖后李氏後唐明宗第五女天成三年四月封永寧公主長興四年九月進封魏國長公主清泰二年九月改封晉國長公主晉天福元年十一月冊爲皇后七年六月尊爲皇太后開運四年三月與少帝同遷於契丹之黃龍府

降契丹表

晉室皇太后媳婦李氏妄言張彥澤富珠哩等至伏蒙皇帝阿翁降書安撫者妾伏念先皇帝頃在并汾適逢屯難危同累卵急若倒懸智勇俱窮朝夕不保皇帝阿翁發自

冀北親抵河東跋履山川踰越險阻立平巨孽遂定中原  
救石氏之覆亡立晉朝之社稷不幸先帝厭代嗣子承祧  
不能繼好息民而反虧恩辜義兵戈屢動駟馬難追戚實  
自貽咎將誰執今穹旻震怒中外攜離上將牽羊六師解  
甲妾舉宗負釁視景偷生惶惑之中撫問斯至明宣恩旨  
曲賜含容慰諭丁寧神爽飛越豈謂已垂之命忽蒙更生  
之恩省罪責躬九死未報今遣孫男延煦延寶奉表請罪  
陳謝以聞

漢高祖李皇后

高祖皇后李氏晉陽人高祖領藩鎮累封魏國夫人天福十二年冊爲皇后隱帝即位尊爲皇太后周太祖入京請后權臨朝聽政及即位上尊號曰昭聖皇太后居太平宮顯德元年薨

議擇嗣君誥

高祖皇帝翦亂除凶變家爲國救生靈於塗炭創王業於艱難甫定寰區遽遺弓劍樞密使郭威楊邠侍衛使史宏肇三司使王章親承顧命輔立少君協力同心安邦定國旋屬四方多事三叛連衡吳蜀內侵契丹啟釁蒸黎恟懼

宗社阽危郭威授任專征提戈進討躬當矢石盡掃烟塵  
外寇盪平中原寧謐復以強敵未殄邊塞多艱允賴寶臣  
往臨大鄴疆場有藩籬之固朝廷寬宵旰之憂不謂凶豎  
連謀羣小得志密藏鋒刃竊發殿庭已殺害其忠良方奏  
聞於少主無辜受戮有口稱冤而又潛差使臣矯賞宣命  
謀害樞密使郭威宣徽使王峻侍衛步軍都指揮使王殷  
等人知無罪天不助奸今者郭威王峻澶州節度使李洪  
義前曹州防禦使何福進前復州防禦使王彥超前博州  
刺史李筠北面行營馬步都指揮使郭崇步軍都指揮使

曹英護聖都指揮使白重贊索萬進田景咸樊愛能李萬全史彥超奉國都指揮使張鐸王暉胡立弩手指揮使何贊等徑領兵師來安社稷逆黨皇城使李業內客省使閻晉卿樞密都承旨聶文進飛龍使後贊翰林茶酒使郭允明等脅君於大內出戰於近郊及至力窮遂行弑逆冤憤之極今古未聞今則凶黨旣除羣情共悅神器不可以無主萬幾不可以久曠宜擇賢君以安天下河東節度使崇許州節度使信皆高祖之弟徐州節度使贊開封尹承勳高祖之男俱列盤維皆居屏翰宜令文武百辟議擇嗣君

以承大統

冊徐州節度使贇即帝位誥

天未悔禍喪亂孔多嗣王幼冲羣凶蔽惑構奸謀於造次  
縱毒蠱於斯須將相大臣連頸受戮股肱良佐無罪見屠  
行路咨嗟羣心扼腕則高祖之洪烈將墜於地賴大臣郭  
威等激揚忠義拯濟顛危除惡蔓以無遺俾綴旒之不絕  
宗祧事重續繼才難旣聞將相之謀復攷著龜之兆天人  
協贊社稷是依徐州節度使贇稟上聖之資抱中和之德  
先皇如子鍾愛特深固可以子育兆民君臨萬國宜令所

司擇日備法駕奉迎即皇帝位於戲神器至重天步方艱  
致理保邦不可以不敬貽謀聽政不可以不勤允執厥中  
祇膺景命

臨朝誥

昨以姦邪搆釁亂我邦家勲德效忠翦除凶慝俯從人欲  
已立嗣君宗社危而再安紀綱壞而復振皇帝法駕未至  
庶事方殷百辟上言請予莅政宜允輿議權總萬幾止於  
浹旬即復明辟

命宰臣權軍國事誥

王室多故邊境未寧內難雖平外寇仍熾據北面奏報強敵奔衝繼發兵師未聞平殄須勞上將暫自臨戎宜令樞密使郭威部署大軍早謀掩擊其軍國庶事權委宰臣竇貞固蘇禹珪樞密使王峻等商量施行在京馬步兵士委王殷都大提舉

降封徐州節度使贊爲湘陰公誥

比者樞密使郭威志安社稷議立長君以徐州節度使贊高祖近親立爲漢嗣爰自藩鎮徵赴京師雖誥命尋行而軍情不附天道在北人心靡東適當改卜之初俾膺分土

之命贊可降授開府儀同三司檢校太師上柱國封湘陰公食邑三千戶食實封五百戶

答周太祖誥

侍中功烈崇高德聲昭著翦除禍亂安定乾坤謳歌有歸  
歷數攸屬所以羣情推戴億兆同歡老身未終殘年屬茲  
多難唯以衰朽託於始終載省來牋如母見待感仞深意  
涕泗橫流其諸誠懷難盡宣述

後唐魏王繼岌

繼岌莊宗子莊宗即位充北都留守同光三年封魏王是

年伐蜀以爲都統蜀平回軍至渭南聞莊宗敗師徒潰散  
自縊死

喻蜀郡檄

捨過論功王者示好生之道轉禍爲福聖人垂善變之文  
矧彼蜀人代承唐德元宗朝以兵興河塞久駐金鑿僖宗  
朝以盜起中原曾停玉輅蜀之乃祖乃父或士或人而皆  
內稟忠貞外資驍果武負關張之氣文傳揚馬之風迎大  
駕以涉岷峨合諸軍而定關輔忠氣冠乎日月勲業著乎  
山河凡在幽遐皆所傳達不幸龜龍忽去蛇豕尋生過此

匪人據斯重地蜀主先父出身陳許擁衆巴庸接王室之  
頻遷保邊隅而自大蓋屬昭宗皇帝方茲播越正切撫綏  
洗彼瑕疵潤之雨露綰紅旆碧幢之貴兼鳳池雞樹之榮  
狂兇逢山漸展橫行之志鳴臬出穴曾無返哺之聲拔本  
塞源見利忘義加以結連同惡聚集羣凶當天步多艱莫  
展扶持之節及坤維暫絕却爲僭僞之謀烈士聞之撫膺  
懦夫見之攘臂洎茲餘裔益奮殘妖闔監擅權而勲賢結  
舌不稼不穡奢侈者何啻千門內淫外荒塗炭者已餘萬  
室而更納其短見侮我大朝輒橫拒轍之臂擬舉投羅之

金史卷之三十一 十一  
翼我皇帝仰膺元讖再造皇圖四時順而玉燭明萬彙安  
而金繩正惟茲蜀土敢隔朝風連營虧恤養之恩比屋困  
煩苛之政每聞殘酷深所憫傷是命車徒以申弔伐步卒  
則轟如山列騎車則迅若雷奔振雄聲而聒動乾坤騰銳  
氣而動搖河嶽彼若率兵赴死我則無陣不摧彼若據壘  
偷生我則無城不拔却慮高低士庶遠近封巡不早迴翔  
終同覆滅故今曉示貴在保全應三川管內有以藩鎮降  
者即授之節度有以州郡降者即授之刺史有以鎮縣降  
者即付之主守有能見機知變誅斬僞命將帥以其藩鎮

城池降者亦以其官授之如列陣交鋒之際有以萬人已上降者授之節度五千人已上授之大郡三千人已上授之次郡一千人已上授之主將有蜀城將校誅斬僞主首領降者授以方鎮如蜀主王行首過自新以三川歸國即授方面其同謀將校當加列爵有舊在本朝文武官或負罪流落在蜀者苟能率衆歸朝一切不問大軍所行之處不得焚燒廬舍剽掠馬牛所有降人倍加安撫所罪者一人僭僞所救者萬姓瘡痍況蜀主宗枝成都父老較其罪狀良可矜寬只如僞梁挾我皇威窺吾大寶爲四十年之

巨寇覆十九葉之丕基昨國家平定中原只誅元惡列藩  
牧伯咸不替移闔境生靈一無騷擾雖蜀中遐僻亦合傳  
聞各宜審計變通速謀歸向據茲事件得以旌酬勿謂無  
言竟貽後悔故茲示諭各宜知悉

欽定全唐文卷一百二十八目錄

吳王楊行密

舉史實牒

吳僞帝楊溥

褒贈聶師道詔

南唐先主李昇

恤農詔

享太廟詔

禁上尊號詔

罷李建勳詔

舉用儒吏詔

旌張義方直言詔

遺詔

南唐嗣主李景

恤民詔

賜周宗詔

上周世宗第一表

上周世宗第二表

謝遣王崇質等歸國表

進奉錢絹茶米等表

進買宴錢第一表

進買宴錢第二表

請令鍾謨歸國表

請改書稱詔表

上漢帝書

奉大周皇帝書

南唐後主李煜

即位上宋太祖表

乞緩師表

不敢再乞潘慎修掌記室手表

送鄧王二十六弟收宣城序

卻登高文

昭惠周后誄

書評

欽定全唐文卷一百二十八

吳王楊行密

行密字化源廬州合肥人自廬州刺史累遷淮南節度使  
乾寧二年表請討朱全忠加檢校太傅同中書門下平章  
事封宏農郡王四年授江南諸道行營都統擊敗全忠於  
淮水遂全有江淮之地光化三年加侍中天復二年拜東  
面行營都統中書令進封吳王天祐二年十一月薨年五  
十四謚武忠子溥僭稱帝追尊爲太祖武皇帝廟號太祖

舉史實牒

勅淮南觀察使東南諸道行營都統牒左押衙充右弩隊  
都指揮使溧陽洛橋鎮遏使知茶鹽榷麴務銀青光祿大  
夫檢校刑部尚書兼御史大夫上柱國史實牒奉處分前  
件官譽馳鄉里才達變通禦邊徼以多能緝兵戎而有術  
加以洞詳稼穡善撫蒸黎賦輿深見其否臧案簿窮知其  
利病以久無宰字尤藉招攜俾分兼領之榮庶養新歸之  
俗儻聞報政別議酬勞事須差兼知溧陽縣事準狀牒舉  
者故牒天復三年十一月九日牒使檢校太師守中書令

吳王押

吳僞帝楊溥

溥行密幼子初封丹陽郡公後繼兄涓僭僞號晉天福二年遜位於李昇昇遷溥於潤州年餘以幽死

褒贈聶師道詔

詢諸贈典繫乃彝章啟有厥由予何不舉故淮浙宣歙管內道門威儀逍遙大師問政先生爲國焚修大德賜紫聶師道早通元理夙契真風野鶴不羣孤雲自在昔太祖創基之際已命焚修及元勲匡國之初早曾瞻敬眷言素業實冠元關雖升遐屢歷於光陰而遺懿益隆於寰宇况教

門上請台輔奏陳且將啟元墟即回故里是用加之峻秩  
錫以崇階式表休恩庶昭往行可贈銀青光祿大夫鴻臚  
卿問政先生

南唐先主李昇

昇字正倫本姓李徐州人幼孤養於徐溫遂冒姓徐氏名  
知誥吳天祐中自元從指揮使遷昇州防禦使累遷檢校  
太保潤州團練使朱瑾殺溫子知訓知誥以州兵入廣陵  
定亂遂代知訓爲淮南節度行軍副使內外馬步都軍副  
使武義元年拜左僕射參知政事順義元年加同平章事

領江州觀察使溫死加都督中外諸軍事封潯陽公改封  
豫章公太和三年以太尉中書令領鎮海寧國諸軍節度  
使出鎮金陵天祚元年加尚父太師大丞相天下兵馬大  
元帥進封齊王三年受吳禪即皇帝位國號大齊尋改號  
唐改元昇元復姓李氏更今名七年二月殂年五十六僭  
謚光文肅武孝高皇帝廟號烈祖

恤農詔

比者干戈相接人無定主地易而弗藝桑隕而弗蠶衣食  
日耗朕甚憫之其嚮風面內者有司計口給食願耕植者

授之土田仍復三歲租役於嘻仁不異遠化無泄邇其務  
宣流以稱朕意

享太廟詔

禮莫重於享帝孝莫大於隆親事實重大承以輕眇可謂  
無其德而用其事祇加畏焉於嘻爾公爾侯各揚厥職不  
供迺事國有常典

禁上尊號詔

朕以眇躬託於民上常懼弗類以隆高祖太宗之遺業羣  
公卿士願欲舉上尊號之禮朕甚不取其勿復以聞

罷李建勲詔

右僕射兼中書侍郎同平章事監修國史李建勲幸處台司且聯戚里靡循紀律敢黷彝章其罷歸私第

舉用儒吏詔

前朝失御強梗崛起大者帝小者王不以兵戈利勢弗成不以殺戮威武弗行民受其弊蓋有年也或有意於息民者尚以武人用事不能宣流德化其宿學巨儒察民之故者巖巖之下往往有之彼無路光亨而進以拊偃爲嫌退以清寧爲樂則上下之情將何以通簡易之政將何所議

乎昔漢世祖數年之間被堅執銳提戈斬馘一日晏然而  
兵革之事雖父子之親不以一言及之則兵爲民患其來  
尚矣今唐祚中興與漢頗同而眇眇之身坐制元元之上  
思所以舉而錯之者煢煢在疚罔有所發三事大夫可不  
務乎自今宜舉用儒者以補不逮

旌張義方直言詔

孤始任義方以風憲乃能力振朝綱辭皆謹切可宣示朝  
野賜義方衣一襲以旌直言

遺詔

迺公迺侯越百執事欽承嗣命命爾保元子璟祗肅天鑒  
社稷宗廟永有終我不敢知曰其基永昌我亦不敢知曰  
墜命罔後天不爾謚祐於有德厥位艱哉

南唐嗣主李景

景本名璟字伯玉先主昇長子年十歲官駕部郎中累進  
諸衛將軍拜司徒平章事知中外諸軍事都統先主受禪  
封吳王徙封齊王爲諸道兵馬大元帥先主殂襲位改元  
保大十三年周世宗南侵遣使請奉正朔不許中興元年  
周再南侵表請獻江北郡縣避周諱更今名下令去帝號

奉正朔顯德七年宋受周禪遣使如宋賀即位建隆二年  
六月殂年四十六告哀於宋請追復帝號僭諡明道崇德  
文宣孝皇帝廟號元宗

恤民詔

春秋日食地震星孛木冰感召靡爽比災異頻仍豈人君  
不德以致之耶抑亦天心仁愛而譴告之也朕甚惕焉曩  
者兵連閩越武夫悍將不喻朕意務爲窮黷以至父征子  
餉上違天意下奪農時咎將誰執在予一人其大赦境內  
窮民無告者咸賜粟帛

賜周宗詔

崧嶽降靈誕生良弼佐我先朝施及朕躬尚賴保釐底於  
成績乃遽爾請罷豈朕不能優禮勲舊而致然也昔蕭何  
守巴蜀高祖無西顧之患寇恂守河內光武無分民之嫌  
今任公以何恂之事宜強飯扶力以副朕意於嘻國之安  
危惟茲淮甸慎始成終非公而誰所請宜不允

上周世宗第一表

臣聞捨短從長乃推通理以小事大著在格言實徵自古  
之來即有爲臣之禮既逢昭代幸履良途伏惟皇帝陛下

體上聖之姿膺下武之運協一千而命世繼八百以卜年  
化被區中恩加海外虎步則時欽英主龍飛則圖應真人  
臣僻在一方謬承餘業比徇軍民之欲乃居后辟之崇雖  
仰慕華風而莫通上國伏自初勞將帥遠涉封疆敘寸誠  
則去使甚艱於間路則單函兩獻載惟素願方俟睿慈遽  
審大駕天臨六師雷動猥以遐陬之俗親爲跋履之行循  
省伏深兢畏無所豈因薄質有累蒸人伏惟皇帝陛下義  
在寧民心惟庇物臣倘或不思信順何以上協寬仁今則  
仰望高明俯存億兆虔將下國永附天朝已命邊城各令

固守見於諸路皆俾戢軍仰期宸旨纔頒當發專人布告  
伏冀詔虎賁而歸國巡雉堞以迴兵萬乘千官免驅馳於  
原隰地征土貢常奔走於歲時實在神明誓於天地庶使  
闔境荷咸寧之德大君有光被之功凡在照臨孰不歸慕  
謹令翰林學士戶部侍郎臣鍾謨工部侍郎文理院學士  
臣李德明奉表以聞仍進金器一千兩銀器五千兩錦綺  
綾羅二千匹及御衣犀帶茶茗藥物等又進犒軍牛五百  
頭酒二千石

上周世宗第二表

伏自上將遠臨六師尋至始貢書於閒道旋奉表於行宮  
虔仰天光實祈睿旨伏聞朝陽委照爍火收光春雷發音  
蟄戶知令惟變通之有在則去就以斯存所以徘徊下風  
瞻望時雨載傾捧日輒敘攀鱗伏惟皇帝陛下受命上元  
門階中立仗武功而戡亂略敷文德以化遠人故得九鼎  
慶基復昌於寶位十年嘉運允正於璿衡實帝道之昭融  
知真人之有立臣幸因順動敢慕文明特遣翰林學士尚  
書戶部侍郎臣鍾謨尚書工部侍郎文理院學士臣李德  
明同奉表章且申獻贄請從臣事仍備歲輸冀闔境之咸

寧識人君之廣覆不遙日下恭達御前既推向化之誠更  
露絲衷之願臣伏念天祐之後率土分摧或跨據江山或  
革遷朝代皆爲司牧各拯黎元臣絲是克嗣先基獲安江  
表誠以瞻烏未定附鳳何從今則青雲之候明懸白水之  
符斯應仰祈聲教俯被遐方豈可遠動和鑿上勞薄伐有  
拒懷來之德非誠信順之心臣自遣鍾謨李德明入奏天  
朝具陳懇款便於水陸皆戢兵師方冀寬仁下安億兆旋  
進歷陽之旌旆又屯隋苑之車徒緣臣既寫傾依悉曾止  
約令罷警嚴之備不爲捍禦之謀其或皇帝陛下未息雷

霆靡矜葵藿人當積懼衆必貪生若接前鋒偶成小競在  
其非敵固亦可知但以無所爲圖出於不獲必於軍庶重  
見傷殘豈唯瀆大君亭育之慈抑乃增下臣咎釁之責進  
退維谷夙夜靡遑臣復思東則會稽南惟湘楚盡承正朔  
俾主封疆自皇帝陛下允屬天飛方知海納雖無外之化  
徒仰祝於皇風而事大之儀闕卑通於疆吏惟憑元造猥  
念後期方今八表未同一戎茲始倘或首於下國許作外  
臣則柔遠之風其誰不服無戰之勝自古獨高臣幸與黎  
人共依聖政蚩蚩之俗期息於江淮蕩蕩之風廣流於華

裔永將菲薄長奉欽明白日誓心皇天可質虔輸肺腑上  
祈冕旒仰俟聖言以聽朝命今遣守司空臣孫晟守禮部  
尚書臣王崇質部署宣給軍士物上進金一千兩銀十萬  
兩羅綺二千匹

謝遣王崇質等歸國表

臣叨居舊邦獲嗣先業聖人有作曾無先見之明王祭弗  
供果致後時之責六龍電邁萬騎雲屯舉國震驚羣臣惴  
悚遂馳下使徑詣行宮乞停薄伐之師請預外臣之籍天  
聽懸邈聖問未回通宵九驚一食三嘆繇是繼飛密表再

遣行人敘江河羨海之心指葵藿向陽之意皇帝陛下自  
天生德命世應期含容每法於方輿亭育不遺於下國先  
令副介密導宸慈綸旨優隆乾文炳煥仰認懷來之道喜  
則可知深惟事大之言服之無斃

進奉錢絹茶米等表

臣聞盟津初會仗黃鉞以臨戎銅馬旣歸推赤心而服衆  
一則顯周君之雄武一則表漢后之仁慈用能定大業於  
一戎紹洪基於四百兼資具美允屬聖君伏惟皇帝陛下  
量包終古聖合上元子育黎民風行號令以其執迷未復

則薄賜徂征以其向化知歸則俯垂信納仰荷含容之施  
彌堅傾附之念然以淮海遐陬東南下國親勞翠蓋久駐  
王師以是憂慚不遑啟處今既六師返旆萬乘還京合申  
解甲之儀粗表充庭之實但以自經保境今已累年供給  
既繁困虛頗甚曾無厚幣可達深誠然又思內附已來聖  
慈益厚雖在照臨之下有如骨肉之恩縱悉力以貢輸終  
厚顏於微鮮今有少物色以備宣給軍士謹遣左僕射平  
章事臣馮延巳給事中臣田霖部署上進

進買宴錢第一表

臣聞聖人制禮重尊獎之心王者會朝宗燕享之事是以  
此日輒薦微誠竊以臣幸能迷復方認懷來決心既嚮於  
皇風注目每瞻於清蹕伏自陪臣入奉帝誥薦薦臨頓安下  
國之生靈俱荷大君之化育雖復尋令宰輔專拜冕旒少  
傾貢奉之儀仰答含容之德然臣靜思內附欣奉至尊既  
推示其赤心又迴隆於乃睠豈將常禮可表深衷是以別  
命使臣更伸誠懇俾展犒師之禮仍陳買宴之儀躬詣行  
朝聊資高會庶盡傾於臣節如得面於天顏伏惟皇帝陛  
下承天子民溥恩廣施四海識真人之應萬方知王澤之

深固以包括古今絲綸典則盛矣美矣無得而稱凡仰照臨孰不懽悅今遣客省使臣尚全恭專詣行闕進獻犒軍買宴物色

進買宴錢第二表

臣幸將下國仰奉聖朝特沐睿慈俯垂開納已陳鄙禮請展御筵因思盡竭於深衷是敢別陳於至懇伏以柏梁高會宸極居尊朝臣咸侍於冕旒天樂盛張於金石莫不競輸庭實齊獻壽盃而臣僻處遐陬迴承乃睠雖心存於魏闕奈日遠於長安無繇親咫尺之顏何以罄勤拳之意遂

令戚屬躬拜殿庭庶代外臣獲叅執事納忠則厚致禮甚  
微誠慙野老之芹願獻華封之祝謹差臨汝郡公臣徐遼  
部署宴上進獻物色詣闕

請令鍾謨歸國表

臣謬承先業僻在一隅不識天命得罪上國困而後伏何  
足可多許以不亡臣之幸也豈意皇帝陛下辱異常之顧  
垂不世之私外雖君臣內若骨肉殊恩異禮無得而言退  
日揣循何階及此且古人有一飯之恩必報臣竊慕之故  
自結髮已來未嘗敢輕受人惠雖往事君父亦嘗以退讓

自居不圖今辰頓受殊遇此臣所以朝夕慙恨恐上報之  
無從也然天地之功厚矣父母之恩深矣而子不謝恩於  
父人且何報於天以此思之則惟有赤心可酬大造況臣  
嘗嗟世網別貯素懷方以子孫託於陛下區區之意可勝  
言哉兼臣比乞鍾謨過江蓋有情事上告鍾謨又已奉聖  
旨許其放迴伏乞纔到京師即令單騎歸國庶於所奏早  
奉勅裁瞻望冕旒不勝懇禱

請改書稱詔表

臣聞天秩有禮位已定於高卑王者無私事必循於軌轍

倘臣下稍踰名分則朝廷實紊等夷情所難安理須上訴  
竊以臣比承舊制有味先機勞萬乘之時巡方傾改事慶  
千年之嘉會固已知歸伏惟皇帝陛下稟上聖之姿有高  
世之行囊括四海澤潤生民明目達聰道均有截東征西  
怨化被無垠已觀混一之期即仰登封之盛而臣爰從款  
附屢奉德音陛下煦嫗情深優容義切全却藩方之禮惟  
頒咫尺之書粵在事初便知恩遇向者未遑堅讓今茲敢  
瀝至誠且臣頃以德薄道乖時危事感獻誠以奉陛下請  
命以庇國人獲保先基賜之南服莫大之惠曠古未聞微

臣退思所享已極豈於殊禮可以久當伏乞皇帝陛下深鑒卑衷終全舊制凡迴誥命乞降詔書庶無屈於至尊且稍安於遠服乃心懇禱無所寄言

上漢帝書

先因河府李守貞求援又聞大國沿淮屯軍當國亦於境上防備昨聞大朝收軍當國尋已徹備其商旅請依舊日通行

奉大周皇帝書

願陳兄事永奉鄰歡設或俯鑒遠圖下交小國悉班卒乘

俾又蒼黔慶雞犬之相聞奉瓊瑤以爲好必當歲陳山澤之利少助軍旅之須虔俟報章以答高命道塗朝坦禮幣夕行

南唐後主李煜

煜字重光初名從嘉嗣主景第六子封安定郡公進封鄭王徙吳王以尚書令知政事宋建隆二年嗣主南遷立爲太子監國嗣主殂襲位更今名開寶七年宋師南征八年金陵陷肉袒降於軍門封違命侯太平興國初改封隴西郡公三年七月薨年四十二贈太師封吳王

即位上宋太祖表

臣本於諸子實愧非才自出膠庠心疎利祿被父兄之蔭  
育樂日月以優游思追巢許之餘塵遠慕夷齊之高義既  
傾懇悃上告先君固非虛詞人多知者徒以伯仲繼沒次  
第推遷先世謂臣克習義方既長且嫡俾司國事遽易年  
華及乎暫赴豫章留居建業正儲副之位分監撫之權懼  
弗克堪常深自勵不謂奄丁艱罰遂玷纘承因顧肯堂不  
敢滅性然念先世君臨江表垂二十年中閒務在倦勤將  
思釋負臣亡兄文獻太子從冀將從內禪已決宿心而世

宗敦勸既深議言因息及陛下顯膺帝籙彌篤睿情方誓  
子孫仰酬臨照則臣向於脫屣亦匪邀名既嗣宗祊敢忘  
負荷惟堅臣節上奉天朝若曰稍易初心輒萌異志豈獨  
不遵於祖禰實當受譴於神明方主一國之生靈遐賴九  
天之覆燾況陛下懷柔義廣煦嫗仁深必假清光更逾曩  
日遠憑帝力下撫舊邦克獲宴安得從康泰然所慮者吳  
越國鄰於敝土近似深讎猶恐輒向封疆或生紛擾臣即  
自嚴部曲終不先有侵漁免結釁嫌撓干旒宸仍慮巧肆  
如簧之舌仰成投杼之疑曲搆異端潛行詭道願迴鑒燭

顯諭是非庶使遠臣得安危懇

乞緩師表

臣猥以幽孱曲承臨照僻在幽遠忠義自持唯將一心上  
結明主比蒙號召自取愆尤王師四臨無往不克窮途道  
迫天實爲之北望天門心懸魏闕嗟一城生聚吾君赤子  
也微臣薄軀吾君外臣也忍使一朝便忘覆育號咷鬱咽  
盍見捨乎臣性實愚昧才無異稟受皇朝獎與首冠萬方  
奈何一日自踵蜀漢不臣之子同羣合類而爲囚虜乎貽  
責天下取辱祖先臣所以不忍也豈獨臣不忍爲亦聖君

不忍令臣之爲也況乎名辱身毀古之人所嫌畏者也人所嫌畏臣不敢嫌畏也惟陛下寬之赦之臣又聞鳥獸微物也依人而猶哀之君臣大義也傾忠能無憐乎倘令臣進退之跡不至醜惡宗社之失不自臣身是臣生死之願畢矣實存沒之幸也豈惟存沒之幸也實舉國之受賜也豈惟舉國之受賜也實天下之鼓舞也皇天后土實鑒斯

言

不敢再乞潘慎修掌記室手表

昨因先皇臨御問臣頗有舊人相伴否臣即乞徐元楨元

橘方在幼年於熾表素不諳習後來因出外問得劉鋹曾  
乞得廣南舊人洪侃今來已蒙遣到徐元橘其潘慎修更  
不敢陳乞所有表章臣且勉躬親臣亡國殘骸死亡無  
日豈敢別生僥覲干撓天聰只慮章奏之間有失恭慎伏  
望睿慈察臣素心

送鄧王二十六弟牧宣城序

秋山的翠秋江澄空揚帆迅征不遠千里之子于邁我勞  
如何夫樹德無窮太上之宏規也立言不朽君子之常道  
也今子藉父兄之資享鍾鼎之貴吳姬趙璧豈吉人之攸

寶矧子皆有之矣哀淚甘言實婦女之常調又我所不取也臨歧贈別其唯言乎在原之心於是而見噫俗無獲順愛之則歸懷吏無貞污化之可彼此刑唯政本不可以不窮不親政乃民中不可以不清不正執至公而御下則儉佞自除察薰蕕之稟心則妍媸何惑武惟時習知五材之難忘學以潤身雖三餘而忍捨無酣觴而敗度無荒樂以蕩神此言勉從庶幾寡悔苟行之而願益則有先王之明謨具在於緗帙也嗚呼老兄盛年壯思猶言不成文況歲晚心衰則詞豈迨意方今涼秋八月鳴榔長川愛君此行

高興可盡況彼敬亭溪山暢乎遐覽正此時也

卻登高文

玉笋澄醪金盤繡鮫茱房氣烈菊蕊香豪左右進而言曰  
維芳時之令月可藉野以登高矧上林之伺幸而秋光之  
待衰乎余告之曰昔時之壯也情槃樂恣歡賞忘勞悁心  
志於金石泥花月於詩騷輕五陵之得侶陋三秦之選曹  
量珠聘伎紉綵維艘被牆宇以耗帛論邱山而委糟豈知  
忘長夜之靡靡累大德於滔滔愴家艱之如燬縈離緒之  
鬱陶陟彼岡矣企予足望復關兮睇予目原有鵠兮相從

金定全唐詩 卷一百二十一  
二  
飛嗟予季兮不來歸空蒼蒼兮風淒淒心躑躅兮淚漣漣  
無一歡之可作有萬緒以纏悲於戲噫嘻爾之告我曾非  
所宜

昭惠周后誄

天長地久嗟嗟蒸民嗜欲旣勝悲歎糾紛緣情攸宅觸事  
來津貨盈世逸樂尠愁殷沈烏逞兔茂夏凋春年彌念曠  
得故忘新闕景頽岸世閔川奔外物交感猶傷昔人詭夢  
高唐誕誇洛浦構屈平虛亦憫終古況我心摧興哀有地  
蒼蒼何辜殲予伉儷窈窕難追不祿於世玉潤珠融殞然

破碎柔儀俊德孤映鮮雙纖穠挺秀婉孌開揚艷不至冶  
慧或無傷盤紳奚戒慎肅惟常環珮爰節造次有章含顰  
發笑擢秀騰芳鬢雲留鑒眼彩飛光情瀾春媚愛語風香  
瓌姿稟異金冶昭祥婉容無犯均教多方茫茫獨逝捨我  
何鄉昔我新昏燕爾情好媒無勞辭筮無違報歸妹邀終  
咸爰協兆俛仰同心綢繆是道執子之手與子偕老今也  
如何不終往告嗚呼哀哉志心旣達孝愛克全殷勤柔握  
力折危言遺情眇眇哀淚漣漣何爲忍心覽此哀編絕艷  
易凋連城易脆實曰能容壯心是醉信美堪餐朝饑是慰

如何一旦同心曠世嗚呼哀哉豐才富藝女也克肖采戲  
傳能奕棋逞妙媚動占相歌縈柔調茲發爰質奇器傳華  
翠虬一舉紅袖飛花情馳天際思棲雲涯發揚掩抑纖緊  
洪奢窮幽極致莫得微瑕審音者仰止達樂者興嗟曲演  
來遲破傳邀舞利撥迅手吟商逞羽制革常調法移往度  
翦遏繁態藹成新矩霓裳舊曲韜音淪世失味齊音猶傷  
孔氏故國遺聲忍乎湮墜我稽其美爾揚其祕程度餘律  
重新雅製非子而誰誠吾有類今也則亡永從遐逝嗚呼  
哀哉該茲碩美鬱此芳風事傳遐禩人難與同式瞻虛館

空尋所蹤追悼良時心存目憶景旭雕甍風和繡額燕燕  
交音洋洋接色蝶亂落花雨晴寒食接輦窮歡是宴是息  
含桃薦實畏日流空林彫晚籜蓮舞疎紅烟輕麗服雪瑩  
修容纖眉範月高髻凌風輯柔爾顏何樂靡從蟬響吟愁  
槐凋落怨四氣窮哀萃此秋宴我心無憂物莫能亂絃爾  
清商艷爾醉盼情如何其式歌且宴寒生蕙幄雪舞蘭堂  
珠籠暮捲金爐夕香麗爾渥丹婉爾清揚厭厭夜飲予何  
爾忘年去年來殊歡逸賞不足光陰先懷悵快如何倏然  
已爲疇曩嗚呼哀哉孰謂逝者荏苒彌疎我思妹子永念

猶初愛而不見我心燬如寒暑斯疲吾寧御諸嗚呼哀哉  
萬物無心風烟若故惟日惟月以陰以雨事則依然人乎  
何所悄悄房櫳孰堪其處嗚呼哀哉佳名鎮在望月傷娥  
雙眸永隔見鏡無波皇皇望絕心如之何暮樹蒼蒼哀摧  
無際歷歷前歡多多遺致絲竹聲悄綺羅香杳想渙乎怵  
怛恍越乎悴憔悴嗚呼哀哉歲云暮兮無相見期情瞽亂兮  
誰將因依維昔之時兮亦如此維今之心兮不如斯嗚呼  
哀哉神之不仁兮斂怨爲德旣取我子兮又毀我室鏡重  
輪兮何年蘭襲香兮何日嗚呼哀哉天漫漫兮愁雲曠空

曖曖兮愁烟起蛾眉寂寞兮閉佳城哀寢悲氛兮竟徒爾  
嗚呼哀哉日月有時兮龜著既許簫笳淒咽兮旂常是舉  
龍輻一駕兮無來轅金屋千秋兮永無主嗚呼哀哉木交  
枸兮風索索鳥相鳴兮飛翼翼弔孤影兮孰我哀私自憐  
兮痛無極嗚呼哀哉夜寤皆感兮何響不衰窮求弗獲兮  
此心墮摧號無聲兮何續神永逝兮長乖嗚呼哀哉杳杳  
香魂茫茫天步投血撫櫬邀子何所苟雲路之可窮冀傳  
情於方士嗚呼哀哉

書評

善法書者各得右軍之一體若虞世南得其美韻而失其  
俊邁歐陽詢得其力而失其溫秀褚遂良得其意而失其  
變化薛稷得其清而失於拘窘顏真卿得其筋而失於粗  
魯柳公權得其骨而失於生獷徐浩得其肉而失於俗李  
邕得其氣而失於體格張旭得其法而失於狂獻之俱得  
之而失於驚急無蘊藉態度